

宋  
東  
京  
考

宋東京考卷之十八

嘉興石匏周 城緝

河渠

黃河

按物理論河色黃衆川之混蓋濁之也

按宋史河渠志河入中國自太行西曲折山間不能為大患既出大伾東走赴海更平地二千餘里禹迹既湮河并為一特以隄防為之限夏秋霖潦百川奔會不免決溢之憂然有司所以備河者亦益工矣自周顯德初河決東平之楊劉宰相李穀監治隄防水患少息然決河不復故道離而為赤河乾德二年遣使按行將治古

隄議者以舊河不可卒復力役且大遂止但詔民治遙  
隄以禦衝注之患五年正月帝以河隄屢決遣使行視  
發畿甸丁夫繕治自是歲以為常皆以正月首事季春  
而畢是月詔開封府大名府鄆澶滑孟濮齊淄滄棣濱  
德博懷衛鄭等州長吏並兼本州河隄使蓋以謹力役  
而重水患也開寶四年十一月河決澶淵泛數州官守  
不時上言通判司封郎中姚恕棄市知州杜審肇坐免  
五年正月詔曰應緣黃汴清禦等河州縣除準舊制種  
藝桑棗外委長吏課民別樹榆柳及土地所宜之木仍  
按戶籍高下定為五等第一等歲樹五十本第二等以

下逋減十本民欲廣樹藝者聽其孤寡惻獨者免是月  
澶州修河卒賜以錢糶役夫給以茶三月詔曰朕每念  
河渠潰決頗為民患故畧使職以總領焉宜委官聯佐  
治其事自今開封等十七州府各置河隄判官一員以  
本州通判充如通判闕員即以本州官充五月河大決  
濮陽又決陽武詔發諸州兵及丁夫凡五萬人遣潁州  
團練使曹翰護其役翰辭帝謂曰霖雨不止又聞河決  
朕信宿以來焚香上禱於天若天災流行願在朕躬勿  
延於民也翰頓首對曰昔宋景公諸侯耳一發善言災  
星退舍今陛下憂及兆庶懇禱如是固當上感天心必

不為災六月詔曰近者澶濮等數州霖雨洊降淇河為  
患朕以屢經決溢重困黎元每閱前書詳究經瀆至若  
夏后所載但言導河至海隨山濬川未聞力制湍流廣  
營高岸自戰國專利湮塞故道小以妨大私而害公九  
河之制遂隳歷代之患弗弭凡縉紳多士草澤之倫有  
素習河渠之書深知疏導之策若為經久可免董弊並  
許詣闕上書附驛條奏朕當親覽用其所長勉副詢求  
當示甄獎時東魯逸人田吉者纂禹元經十二篇帝聞  
之召至闕下詢以治水之道善其言將授以官以親老  
固辭歸養從之翰至河上親督工徒未幾決河皆塞是

後又決屢命樞密直學士張齊賢翰林學士宋白乘傳  
祭白馬津沈以太牢加璧而黃河之患終宋之世迄無  
寧歲瀕河之民田廬荒圯役調孔亟可謂困苦之甚也  
已

退朝錄 唐時黃河不聞有決溢之患唐書惟載薛平  
為鄭滑節度使始河溢瓠子東泛滑距城纔二里許  
平按求故道出黎陽西南因命其從事裴弘泰往請  
魏博節度使田弘正弘正許之乃籍民田所當者易  
以他地疏導二十里以殺水悍還墾田七百頃於河  
南自是滑人無患此外無所紀蓋河朔地天寶後久

屬藩臣而事不聞朝廷也

水議

古者舜命益作虞以掌山澤周有川澤之禁而後世修之未嘗廢也由秦漢以來使任其事而為之水官則莫若都水之職其主灌溉陂池保守河渠自太常及三輔皆任其官至武帝時尤增重之於是又有左右使者使統其任而居其事者莫不明於禹貢之學而習於知水之性故劉向以治書為三輔都水都尉平當以明禹貢領護河隄是以秦漢之際言水事於書尤著而魏晉以來至於隋唐其官亦未嘗廢於魏則有都尉水衡之號晉宋齊皆曰都水臺或為

水衡令及梁天監中始改曰大舟卿主治舟航河隄  
隋唐之時又皆為都水使者或改曰監而舟楫河渠  
二署隸之然於水事或領或否矣

資治通鑑 自開直河水勢增漲田廬益壞熙寧十年  
七月大決於澶州曹村北流斷絕河道南徙東滙於  
梁山張澤灤分為二派一合南清河入於淮一合北  
清河入於海凡灌郡縣四十五而濮齊鄆徐尤甚壞  
田逾三十萬頃遣使修閉判大名府文彥博言河勢  
變移四散漫流兩岸俱被水患而都水止固護東流  
北岸希省費之賞未嘗增修隄岸今者之決溢非天



災實人力不至也逾年決口塞詔改曹村埽曰靈平  
徽宗時都水使者趙霆得兩首龜於黃河獻以為瑞  
蔡京曰此齊小白所謂象罔見之而霸者也鄭居中  
言首豈有二人皆駭異而京獨主之殆不可測帝命  
棄龜於金明池

治河通考 古自陽武北新鄉西南入境東北經延津  
汲胙城至北直隸濬縣大伾山北入海即禹貢導河  
東過洛汭至於大伾據地志魏郡鄴縣有故大河在  
東北直達於海疑即禹之故河也周定王五年河徙  
則非禹之所穿漢文帝十二年河決酸棗東南流經

封邱入北直隸長垣縣界至山東東昌府濮州張秋  
入海五代至宋兩決鄭州及原武東南陽武南流經  
封邱于家店祥符金龍口陳橋北經蘭陽儀封入山  
東曹縣境分為二派其一東南流至徐州入泗其一  
東北流合會通河國朝洪武七年至十八年二十四  
年陽武原武祥符凡四度渰沒護城隄又決陽武西  
南東南流經封邱陡門祥符東南草店村經府城北  
五里東過焦橋南過蘇村至通許西南分九道名九  
龍口又南至扶溝太康陳項城諸州縣境入南直隸  
太和縣合淮正統十三年河溢仍循陽武故道直抵

張秋入海今皆淤為平地其自滎陽築隄至千乘海口千餘里名金隄自河內北至黎陽為石隄激使東抵東郡為平岡西北抵黎陽觀下東北抵東郡津北西北至魏郡昭陽又自汲縣築隄東接胙城抵直隸滑縣界西接新鄉獲嘉縣界東南接延津縣界名讓河隄在滎陽東南二十里中牟東北境名官渡即曹操與袁紹分兵相拒處築城築臺皆名官渡在汲縣東南境名延津置關亦名延津又置關名金隄在新鄉南境有八柳渡皆因河徙而廢

丹鉛總錄 宋太祖曰夏后治水但言導河至海隨山

濟川未聞力制湍流廣營高岸自戰國專利堙塞故  
道以小妨大以私害公九河之制遂隳歷代之患弗  
弭神宗曰後世以事治水故常有礙以道治水無違  
其性可也如能順水所向遷徙城邑以避之復有何  
患雖禹復生不過如此歐陽修曰開河如放火河決  
為失火又曰避高就下水之本性河流已棄之道自  
古難復文彥博曰河不出於東則出於西利害一也  
今發夫修治徙東徙西何利之有自古治河之說多  
矣若宋二帝之見二臣之言可為百世法

水衡記 黃河水隨月異名正月解凍名凌解水五月

瓜延蔓名瓜蔓水六月名礬山水十一月名感凌  
水冰斷復結感起成層也

歲時廣記 黃河水二月三月名桃花水顏師古漢書  
音義云月令仲春之月始雨水桃始華蓋桃方華時  
既有雨水川谷漲泮衆流盛長故謂之桃花水老杜  
詩云春岸桃花水又云三月桃花浪注曰峽以三月  
桃花發時春水生謂之桃花水王摩詰詩云春來到  
處桃花水歐陽公詩云桃花水下清明路五邠名瓜  
蔓水瓜正蔓也東坡詩云河水渺綿瓜蔓流

續文獻通考 按當時黃河隨時漲落故舉物候為水

勢之名自立春後東風解凍河邊人候水初至凡三寸則夏秋當至一尺頗為信驗故謂之信水二月三月桃花始開冰泮雨積川流猥集波瀾盛長謂之桃花水春末蕪菁花開謂之菜花水四月末隴麥結秀擢芒變色謂之麥黃水五月瓜實延蔓謂之瓜蔓水朔野之地深山窮谷固陰沍寒冰堅晚泮遠乎盛夏消釋方盡而沃蕩山石水帶礬腥併流於河故六月中旬後謂之礬山水七月菽豆方秀謂之豆華水八月葵亂花謂之荻苗水九月以重陽紀節謂之登高水十月水落安流復其故道謂之復槽水十一月十

二月斷冰雜流乘寒復結謂之威凌水水信有常率  
以為準非時暴漲謂之客水其水勢凡移礧橫注岸  
如刺毀謂之劄岸漲溢踰防謂之抹岸埽岸故朽潛  
流漱其下謂之塌岸浪勢旋激岸土上隤謂之淪捲  
水侵岸逆漲謂之上展順漲謂之下展或水乍落直  
流之中忽屈曲橫射謂之經竄水猛驟移其將澄處  
望之明白謂之拽白亦謂之明灘湍怒略渟勢稍沮  
起行舟值之多溺謂之薦浪水水退淤澱夏則膠土  
肥腴初秋則黃減土頗為疏壤深秋則白減土霜降  
後皆沙也舊制歲虞河決有司常以孟秋預調築塞

之物稍芟薪柴撻檣竹石芟索竹索千餘萬謂之春料詔瀕河諸州所產之地仍遣使會河渠官吏乘農隙率丁夫水工收采備用凡伐蘆荻謂之芟伐山木榆柳枝葉謂之稍辦竹糾芟為索以竹為巨索長十尺至百尺有數等先擇寬平之所為埽場埽之制密布芟索鋪稍稍芟相重壓之以土雜以碎石以巨竹索橫貫其中謂之心索卷而束之復以大芟索繫其兩端別以竹索自內旁出其高至數丈其長倍之凡用丁夫數百或千人雜唱齊挽積置於卑薄之處謂之埽岸既下以檣梟閘之復以長木貫之其竹索皆



埋巨木於岸以維之遇河之橫決則復增之以補其缺凡埽下非積數疊亦不能遏其迅湍又有馬頭鋸牙木岸者皆以威水勢護隄焉

祥符縣志 黃河應天漢而出崑崙禹導之自磧石歷龍門至華陰始入於中土其勢汎漲激潰不可測制古今以神目之禹時入北海至周徙於南故道寔失而宋元以來入於淮今去汴城四十餘里自西北沁水縣入境東至虞城縣下達山東濟寧州界洪武二十年河決汴城自安遠門入滄沒官民廨宇甚衆二十四年河決原武縣黑陽山下東南流經汴城東北

五里遂成大河下達於淮而故道遂淤洪武三十二年復決衝塌土城水從封邱門流入裏城官廨民廬渰沒傾圯而城內之水久積不涸永樂九年乃於城之西北三十里自大河北岸復開新河導其水於中灤東入黃河故道正統十三年河溢仍循陽武故道直抵張秋入海歷歲滋久今皆淤為平地矣天順五年復決衝入汴城宗藩皆避水隣邑而官民悉移居城上以俟水消自是之後隄防有法黃河不入汴城百有餘年矣

日知錄 黃河載之禹貢東過洛汭至於大伾北過海

水至於大陸又北播為九河同為逆河入於海者其故道也漢元光中河決瓠子東南注鉅野通於淮泗武帝自臨發卒數萬人塞之築宮其上名曰宣防導河北行復禹舊跡而梁楚之地復寧無水災自漢至唐河不為害幾及千年五代使鑿開運元年五月丙辰滑州河決侵汴曹濮單鄆五州之境環梁山合於汶水與南旺蜀山湖連瀾漫數百里河乃自北而東宋史熙寧十年七月乙丑河大決於澶州曹村北流斷絕河道南徙東滙於梁山張澤灤分為二派一合南清河入於淮一合北清河入於海河又自東而南

矣元豐以後又決而北議者欲復禹迹而大臣力主  
回東之議降及金元其勢日趨於南而不可挽故今  
之河非古之河矣自中年以下奪汴徐州以下奪泗  
清口以下奪淮凡三奪而後注於海今歲久河身日  
高淮泗又不能容矣

### 汴河

按汴京遺蹟志汴河在今縣治南三十五步即浚儀渠  
也源出滎陽大周山合京索須鄭四水東經京城內合  
蔡河名茭水經注作茭一作浪蕩渠又名通濟渠自隋大業初疏  
通濟渠引黃河通淮至唐改名廣濟渠宋都大梁諸水

莫此為重其淺深有度置官以司之都水監總察之每歲自春及冬常於河口均調水勢止深六尺以通行重載為準歲漕運江淮湖浙米數百萬及運東南之產百物衆寶不可勝計又下西山之薪炭內外仰給焉然大河向背不常故河口屢易易則度地形相水勢為口以逆之遇春首輒調數州之民勞費不貲役者多溺死吏又侵漁為奸而京師常有決溢之虞建隆三年十月詔緣河州縣長吏常以春首課民夾岸植榆柳以固隄防淳化二年六月汴水決浚儀縣帝乘步輦出乾元門宰相樞密迎謁帝曰東京養甲兵數十萬居人百萬家天

下轉漕仰給在此一渠水朕安得不顧車駕入泥淖中行百餘步從臣震恐殿前都指揮使戴興叩頭懇請回馭遂捧輦出泥淖中詔興督步卒數千塞之日未盱水勢稍定帝始就次大官進膳親王近臣皆泥淖沾衣知縣宋炎亡匿不敢出特赦其罪至道元年九月詔問侍臣汴水疏鑿之由令參知政事張洎講求其事以聞後元世祖至元二十七年河決祥符之義唐灣自汴城迤東至陳留杞縣汴河及隄皆為所淤而水入蔡河洪武二十四年黃河改徙而蔡河亦淤塞矣今省城延慶觀前有小輓橋汴渠故蹟微存俗名臭河兒

水經注 大禹塞滎澤開之以通淮泗即經所謂浪蕩

渠也漢平帝之世河汴決壞未及得修汴渠東侵日

月彌廣門閭故處皆在水中明帝永平十二年議治

汴渠上乃引樂浪人王景問理水形便景陳利害應

對敏捷帝善之乃賜山海經河渠書禹貢圖及以錢

帛後作隄發卒數十萬詔景與掾作謁者王昊

漢書作吳

治渠防築隄修竭起自滎陽東至千乘海口千有餘

里景乃商度地勢鑿山開澗防過衝要疏決壅積十

里立一水門令更相洄注無復潰漏之患役費以百

億計明年夏渠成帝親巡行詔濱河郡國置河隄員

吏如西京舊制景由是顯名王昊及諸從事者皆增秩一等順帝陽嘉二年又自汴河口以東緣積石為堰通古淮口曰金隄靈帝建寧中又增修石門以遏渠口水盛則通注津耗則輟流

汴水出陰溝於浚儀縣北注陰溝即蕩蕩渠也汴受旃然水丹沁亂流於武德絕河南入滎陽合汴故蕪丹水之稱河沛水斷汴承旃然而東自王賁灌大梁水出縣南而不逕其北夏水洪汎則是瀆津通故渠即陰溝也於大梁北又曰浚水矣故陳留風俗傳云浚水逕其北者也

按水經陰溝水出河南陽武縣蕩渠東南至沛為過水又東南至



下邳淮陵  
縣入於淮

地形志 汴水在大梁城東分為蔡渠

張洎集 禹導河自積石至龍門南至華陰東至砥柱  
又東至於孟津東過洛汭至於大伾即今成皋是也  
或云黎陽山也禹以大河流泛中國為害最甚乃於  
貝邱疏二渠以分水勢一渠自舞陽縣東引入漯水  
其水東北流至千乘縣入海即今黃河是也一渠疏  
畎引傍西山以東北形高敞環隄水勢不便流溢夾  
右碣石入於渤海書所謂北過泲水至於大陸泲水  
即濁漳大陸則邢州鉅鹿澤播為九河同為逆河入

於海河自魏郡貴鄉縣界分為九道下至滄州今為  
一河言逆河者謂與河水往復相承受也齊桓公塞  
以廣田居惟一河存焉今其東界至莽梧河是也禹  
又於滎澤下分大河為陰溝引注東南以通淮泗至  
大梁浚儀縣西北復分為二渠一渠東經陽武縣中  
牟臺下為官渡水一渠始皇疏鑿以灌魏郡謂之鴻  
溝葭蕩渠出自滎陽五池口其鴻溝即出河之溝亦  
曰葭蕩渠漢明帝時樂浪人王景謁者王吳始作浚  
儀渠蓋循河溝故瀆也渠成流注浚儀故以浚儀為  
名靈帝建寧四年於敖城西北疊石為門以遏渠口

故世謂之石門渠渠水東合濟水濟與河渠渾濤東  
注至敖山之北又兼邲之水即春秋晉楚戰於邲邲  
又音汭即汴字古人避反字改從汴渠水又東經滎  
陽北而旃然水自縣東流入汴水鄭州滎陽縣西二  
十里三皇山上有二廣武城二城相去百餘步汴水  
自兩城間小澗中東流而出而濟流自茲乃絕惟汴  
渠首受旃然水謂之鴻渠東晉義熙十三年劉裕西  
征姚秦復浚此渠始有湍流奔注兩岸善潰塞裕更  
疏鑿而漕運焉隋大業三年詔尚書左丞皇甫誼發  
河南丁夫百萬開汴水起滎澤入淮千餘里為通濟

渠唐初改通濟渠為廣濟渠開元末河南採訪使齊  
澣以江淮漕運經淮水有波濤沉損遂浚廣濟渠下  
流自泗州虹縣至楚州淮陰縣北八十里合於淮既  
而水流迅急行旅艱險尋乃廢停却由舊河德宗朝  
歲漕運江淮米四十萬石以益關中時叛將李正已  
田悅皆分軍守徐州臨渦口梁崇義阻兵襄鄧南北  
漕引皆絕於是水陸運使杜佑請改漕路自浚儀西  
十里疏其南涯引流入琵琶溝經蔡河至陳州合潁  
水是秦漢故道以官漕久不由此故填淤不通若畎  
流培岸則功用甚寡不復經汴淮之險朝議將行而

徐州順命淮路乃通至國家膺圖受命以大梁四方  
所湊天下之樞可以臨制四海故小京邑而定都惟  
汴水橫亘國中首承大河漕引江湖利盡南海半天  
下之財賦并山澤之百貨悉由此路而進

斐然集 世言隋煬帝開汴渠以幸揚州文士考禹貢  
言堯都冀州居河下流而入都貢賦重於用民力故  
每州必記入河之水獨淮與河無相通之道求之故  
迹而不得乃疑汴水自禹以來有之不起於隋世既  
久遠或名鴻溝或名官渡或名汴渠大概皆自河入  
淮故淮可引江湖之舟以達於冀也今據後漢書則

平帝時已有汴渠曰河汴決壞則謂輸受之所也蓋  
是發卒數十萬修渠隄則平地起兩岸而汴水行其  
中也十里立一水門更相洄注則以節制上流恐河  
溢為患也是正與今之汴渠制度無異特未有導洛  
之事耳史曰渠隄自滎陽而東則上疑其為鴻溝下  
疑其為官渡者恐未得其要官渡直黃河也故袁曹  
相拒沮授曰悠悠黃河吾其濟乎汴渠自西而東鴻  
溝乃橫亘南北故曰未得其要也獨所謂自禹以來  
有汴者此則不易之論也

夢溪筆談 國朝汴渠發京畿輔郡三十餘縣夫歲

浚祥符中閤門祇候使臣謝德權領治京畿溝洫權  
借浚汴夫自是後三歲一浚始令京畿民官皆兼溝  
洫河道以為常職久之治溝洫之工漸弛邑官徒帶  
空名而汴渠有二十年不浚歲歲堙淤異時京師溝  
渠之水皆入汴舊尚書省都堂壁記云疏治入渠南  
入汴水是也自汴流堙淤京城東水門下至雍邱襄  
邑河底皆高出隄外平地一大二尺餘自汴隄下瞰  
民居如在深谷熙寧中議改疏洛水入汴余嘗因出  
使按行汴渠自京師上善門量至泗州淮口凡八百  
四十里一百三十步京師地勢比泗州凡高十九丈

四尺八寸六分於京城東數里白渠中穿井至三丈方見舊底驗量地勢用水平望之幹尺量之不能無小差汴渠隄外皆是出土故溝水令相通時為一堰節其水候水平其上漸淺涸則又為一堰相齒如階陛乃量堰之上下水面相高下之數會之乃得地勢高下之實

沂公筆錄 汴渠派分洪河自唐迄今皆以為莫大之利然迹其事實抑有深害何哉凡梁宋之地畝澮之利湊流此渠以成其大至隋煬帝將幸江都遂析黃河之流築左右隄三百餘里舊所湊水悉為橫絕散



漫無所故宋毫之地遂成沮洳卑濕且昔之安流今  
乃湍悍覆舟之患十有三昔之漕運冬夏無限今  
則春開秋閉歲中漕運止得半載昔之汴汳兩無艱  
阻今則逆流而上乃重載而行其為難也甚矣汳流  
而下即虛舟而往其為利也背矣矧自天子建都而  
汴水貫都東下每歲霖澍決溢為慮由斯觀之其利  
安在然歷世浸遠詎可卒圖異日明哲之士開悟稽  
惑言復曩迹始信茲言之不謬也

退朝錄 唐時汴河不聞有疏通之事惟鄭畋集議為  
相時汴河淀塞請令河陽節度使於汴口開導仍令

宣武感化節度使嚴帖州縣封閉公私斗門感化即徐州也

開寶八年十一月江南平留汴水以待李國主舟行盛寒河流淺涸詔所在為埧閘瀦水以過舟官吏擊凍督役稍稽則皆何校甚者劾臯以次被罰州縣官降勅而杖之者凡十餘人

東齋記 錢俶進犀帶於太祖太祖卻之曰朕有三條帶與此不同俶求宣示太祖笑曰汴河一條惠民河一條五大河一條俶大愧服

宋東京考卷之十九

嘉興石匏周 城緝

河渠

汴河

談圃 隋開汴河其勢正衝今南京至城外迂其勢以避之古老相傳為留趙灣至藝祖以宋州節度使即帝位乃其識也

玉壺清話 周顯德中遣周景大濬汴口景知汴口曉濬舟楫無壅將有淮浙巨商糧斛萬貨臨汴無委泊之地諷世宗乞令許京城民環汴栽榆柳起臺榭以

為都會之壯上許之景踞汴流中起巨樓十二間方  
運斤上輦輅過因問之知景所造頗喜賜酒犒其兵  
不悟其規利也景後邀巨貨於樓山積波委歲入數  
萬計云其黷貨罔上如此

文獻通考 神宗熙寧十年提舉汴河隄岸司言京東  
地富穀粟可以漕運但以河水淺澁不能通舟近修  
京東河岸開斗門通廣濟河為利甚大今請通津門  
裏汴河岸東城裏三十步內開河一道及置斗門上  
安水磨下通廣濟河應接行運從之

聞見近錄 汴河舊底有石板石人以記其地里每歲

興夫開導至石板石人以為則歲有常役民未嘗病之而水行地中京師内外有八水口泄水入汴故京師雖大雨無復水患昔人之畫善矣偶張君平論京畿南京宿亳陳潁蔡等州積水以南京言之自南門二隄直抵東西二橋左右皆瀦澤也漁舠鳴榔如江湖君平請權借汴夫三年通泄積水於是諸郡守令等始帶溝洫河道三年而奏功凡瀦積之地悉為良田自是汴河夫借充他役而不復開導至元祐五年實七十年又舊河並以木岸後人止用土筏棧子謂之外添裏補河身奔脫即外補之故河日加淺而水

行地上矣

南京去汴河五里河次謂之河市五代國初官府罕至舟車所聚四方商賈孔道也其盛非宋州比凡群有晏設必召河市樂人故至今俳優曰河市樂人者由此也

止齋集 本朝定都於汴漕運之法分為四路江南淮南浙東西荆湖南北六路之粟自淮入汴至京師陝西之粟自三門白波轉黃河入汴至京師陳蔡之粟自閿河蔡河入汴至京師京東之粟自五丈河歷陳濟及鄆至京師四河所運惟汴河為最重

揮塵後錄 汴水湍急失足者隨流而下不可復活舊  
有短垣以限往來久而傾圯民佃以為浮屋元祐中  
方達源為御史建言乞重修短垣護其隄岸疏入報  
可遂免滄溺之患

東都事略 徽宗時京師大水汴且溢或請決汴水南  
岸以護宮城者戶部侍郎唐恪曰水漲而決是無可  
奈何今決而浸之是棄民也乃止恪泛小舟歷覽水  
之源委而求所以利導之乃決金隄導而注之河踰  
旬而水平

兩山墨談 宿州至靈璧縣循古岸而行問之乃汴隄

下卽汴河也煬帝鑿此以幸江都世代變遷故道淤塞宋濬之以通運餉而東南舟車之赴汴京者必由於此米芾所謂船頭出浪翠屏間蓋指此河也今歲久復湮且種藝成畝矣隄間多卧古峯石空嵌秀溜蒼翠可掬亦有甚大者相傳謂宋營艮嶽取石於靈璧綱運未訖而汴都被兵遂棄於此千載尤物撫之可勝浩歎云

一統志 汴河舊自滎陽縣東經汴城內又東合蔡河名蔡溝集又名通濟渠東注泗州下入於淮累因河決其蔡河湮沒無跡而汴河自汴城中牟縣入黃河



矣

蔡河

按祥符縣志蔡河舊在縣南九十里貫注汴城為都人所仰兼閔水洧水湟水以通舟楫閔水自尉氏歷祥符合於蔡是為惠民河洧水自許田注鄆陵東南歷扶溝合於蔡湟水出鄭之大隗山注臨潁歷鄆陵扶溝合於蔡凡許鄭諸水悉會焉猶以其淺涸故植木橫棧為水之節啟閉以時建隆二年命中使浚蔡河設斗門節水自京師距通許鎮三年詔發畿甸陳許丁夫數萬疏浚南入潁川其自尉氏北流至汴京戴樓門東由廣利水

門入城名西蔡河接閼水繚繞城內其從陳州門西普濟水門出城流經通許鎮復接舊蔡河名東蔡河即所謂惠民河也又至陳州東南蔡河口入沙河以通陳蔡汝潁諸州之漕運元至元二十七年黃河決祥符之義唐灣而西蔡河上源湮塞其汴河下流亦皆淤塞而不能東達淮泗水亦入於蔡河後以水淺不能行舟乃立閘以積水洪武初自裏城東南置小木閘一十有九處以通舟楫洪武三十二年黃河泛溢而河及閘俱被湮廢今南薰門內東西有河積水弗涸不復通舟楫矣是以河之上有東西二橋見存東曰小橋直對南薰門西

曰雷家橋在今南察院前即巡撫治所也

國朝會要 惠民河與蔡河一水即閔河也建隆元年

始命陳承昭督丁夫導閔河自新鄭與蔡水合貫京  
師南歷陳潁達壽春以通淮右舟楫相繼商賈畢至  
都下利之於是西南為閔河東南為蔡河開寶六  
年始改閔河為惠民河

九域志 浚儀縣之琵琶溝即蔡河也

資治通鑑注 蔡河古之琵琶溝在浚儀縣杜佑曰漢  
運路出浚儀十里路入琵琶溝至陳州而合宋白曰  
建中初杜佑改漕路自浚儀西十里路其南涯引流

入琵琶溝經蔡河至陳州合潁是秦漢故道自隋開  
汴河利涉揚楚故官漕不復由此道佑始開之

楓窻小牖

汴京河渠凡四曰蔡河自陳蔡由西南戴

樓門入京城繚繞向東南陳州門出曰汴河自西京  
洛口分水從東水門入京城繞州橋御路水西門出  
曰五丈河來自濟鄆由新曹門入通汴河曰金水河  
自京城西南分京索河築隄從汴河上用木槽架過  
從西北水門入京城夾牆遮擁入大內灌後苑池浦  
先是詔析金水河透槽回水入汴北引洛水入禁中  
賜名天源河然舟至啟槽頗妨行舟乃自城西超宇

坊引洛水由咸豐門立隄凡三千三十步水遂入禁中而槽廢

### 金水河

按一統志金水河在鄭州西南二十五里宋時引入汴京故名

汴京遺蹟志 金水河一名天源本京水導自滎陽黃堆山其源曰祝龍泉建隆二年春命左領軍衛上將軍陳承昭率水工鑿渠引水過中牟名曰金水河凡百餘里抵都城西架其水橫絕於汴設斗閘入浚溝通城濠東匯於五丈河公私咸利焉乾德三年又引

貫皇城入後苑內庭池沼水皆至焉開寶九年帝步  
自左掖按地勢命水工引金水由承天門鑿渠為大  
輪激之南注晉王第大中祥符二年詔供備庫使謝  
德權決金水自天波門至乾元門歷天街東轉繞太  
廟入后廟皆甃以確甃植以芳木車馬所經又疊石  
為閘梁作方井官寺民舍皆得汲用復東引由城下  
水竇入於濠京師便之元豐五年金水河透水槽阻  
礙上下汴舟遺宋用臣按視請自板橋別為一河引  
水北入於汴後卒不行乃由副隄河入於蔡以源流  
深遠與永安青龍河相合故賜名天源先是舟至啟

槽頗滯舟行既導洛通汴遂自城西起宇坊引洛水  
由咸豐門立隄凡三千三十步水遂入禁中而槽廢  
然舊惟供洒埽至政和間容佐請於七里河開月河  
一道分減此水灌溉內中花竹命宋昇措置導引宣  
和元年復命藍從熙孟揆等增隄岸置橋槽壩牐濬  
澄水道水入內內庭池籞既多患水不給又於西南  
水磨引索河一派架以石渠絕汴南北築隄導入天  
源河以助之自金元以來淤塞無存矣

### 大黃寺河

按大黃寺河一名埽頭河在城東北三十五里即黃河

宋東萊考  
卷之十九  
之支流也

### 五丈河

按汴京遺蹟志五丈河在安遠門外唐武后時引汴水入白溝接注湛渠以通曹充之賦因其廣五丈故名五丈河即白溝河之下流也唐末湮塞周顯德四年疏汴水入五丈河自是齊魯舟楫皆達於汴六年浚五丈河以通漕運建隆二年正月遣使往定陶規度發曹單丁夫數萬以浚之歲漕上供米六十二萬石太祖曰勞民奉已朕不忍為今浚河不獲已也三月幸新水門觀放水入河先是五丈河泥淤不利行舟詔陳承昭於京城



之西夾汴水造斗門引京索蔡河水通城壕入斗門俾  
架流汴水之上東進於五丈河以便東北漕運公私咸  
利三年正月遣陳承昭護修五丈河車駕臨視賜承昭  
錢二十萬乾德三年京師引五丈河造西水碓太平興  
國三年正月命發近縣丁夫浚廣濟河其河自汴城西  
則名白溝由善利水門東北則名五丈其實一河也後  
更名廣濟河金元以來累經黃河泛溢淤塞

沂公筆錄 國初方隅未一京師儲廩仰給惟京西京  
東數路而已河渠轉漕最為急務京東自濰密以西  
州郡租賦悉輸沿河諸倉以備上供清河起青淄合

東阿歷齊鄆涉梁山梁濟州入五丈河達汴都歲漕  
百餘萬石所謂清河即濟水也而五丈河常苦淤淺  
每春初農隙調發衆夫大興力役以事開濬始得舟  
楫通利無所壅遏太祖素知其事尤所屬意至歲中  
興役之際必輿駕親臨督課率以為常先是春夫不  
給口食古之制也上惻其勞苦特令一夫日給米二  
升天下諸處役夫亦如之迄今遂為永式

道山清話 元符二年十二月一日水開五丈河數處

波浪湧起亦有聲如潮水高丈餘數日而止

埤雅廣要 宣和元年五月有龍見於京師茶肆傭晨

興見大犬蹲榻傍近視之則龍也軍器作坊兵士取而食之逾五日大雨如注歷七日而止京城外水高十餘丈帝懼甚命林靈素治水不驗遂命戶部侍郎唐恪決汴水下流入五丈河起居郎李綱言國家都汴百五十餘年矣夫變不虛生必感召之灾望求直言採而用之以答天戒詔貶一官為縣去

### 六丈河

按河南通志六丈河在城北封邱門外世傳宋時恐河水為患故開此河以殺其勢

祥符縣志 諺云爾有三丈水我有六丈河即是河也

洪武二十四年及三十二年兩遭黃河泛溢淤塞焉

### 伯俞河

按伯俞河在城西南三十里八角保伯俞村漢孝子韓伯俞居此故名下流南經木魚寺北合汴水至通許清水口入黃河蓋其河自中牟界東流至八角保則名伯俞河下至新倉則名安家河至鄭店則又名魯溝河隨地而異名其實一河也

祥符縣志 韓俞字伯俞有過其母笞之泣母曰他日笞子未嘗泣今泣何也對曰俞得罪笞常痛知母之力猶壯故受而不泣今母之力不能使痛知母力已

衰受而輒泣乃以母老將至也今縣西南八角保有伯俞河南有伯俞村即所居之處此河亦以孝而得名也

### 掣水河

按祥符縣志掣水河有二一在城南戴樓門外其流東一在城東揚州門外其流南二流奔至東南相合為一南至赤倉保鍾家岡達於黃河其河之名古未有也至永樂二年因河水為患城之内外積水不涸有司督率軍夫始開導以利民是後河雖溢流而水不復入城故名

沙海

按一統志沙海在城西北十二里隋文帝疏鑿舊跡引  
汴水習舟師平陳後立碑其側以紀功累經河水淤平  
莫詳其處

戰國策 齊欲發卒取周九鼎顏率說曰夫梁之君臣  
欲得九鼎謀於沙海之上為日久矣

非菴詩話 戰國策暉臺之下沙海之上九域志有沙  
海孟浩然和張三自穰縣還途中遇雪詩風吹沙海  
雪來作柳園春正是梁地事

牧澤

按牧澤在城東南吹臺北一名蓬陂累經河水淤平真宗時即其地鑿為池曰凝碧池

陳留風俗傳 浚儀縣北有浚水像而儀之故曰浚儀縣有倉頡師曠城上有列仙之吹臺北有牧澤中出蘭蒲土多雋髦今帶牧澤方一十五里俗謂之蒲關澤

### 湛渠

按一統志湛渠在府城外唐載初元年引汴水注白溝以通漕運久經黃河泛溢淤為平地矣

### 白溝

按汴京遺蹟志白溝無山源每歲水潦甚則通流纔勝百斛船踰月不雨即竭至道二年內殿崇班閻光澤國子博士邢用之上言請開白溝自京師抵彭城呂梁口凡六百里以通長淮之漕詔發諸州丁夫數萬治之以光澤護其役議者非之會宋州通判王矩上表極陳其不可且言用之田園在襄邑歲苦水潦私幸渠成遂罷其役咸平六年用之為度支員外郎又令自襄邑下流治白溝河導京師積水而民田無害熙寧六年都水監丞侯叔獻請儲三十六陂及京索二水為源倣真楚州開平河置楫則四時可行舟因廢汴渠帝曰白溝工料



易耳第汴渠歲運甚廣河北陝西資焉又京畿公私所用良材皆自汴口而至何可遽廢王安石曰此役苟成亦無窮之利也當別為漕河引黃河一支乃為經久馮京曰若白溝成與汴蔡皆通漕為利誠大恐汴河終不可廢帝然之詔劉瑄同叔獻覆視八月都水監言白溝自濰河至於淮八百里乞分三年興修其廢汴河俟白溝畢工別相視仍請發穀熟淤田司并京東汴河所隸河清兵赴役從之七年正月都水監言自盟河畎導汴南諸水近者失於疏浚為害甚大於是輟夫修治而白溝之役廢初王安石欲罷白溝修汴南水利帝曰人多

以白溝不可為而卿獨見可為安石曰果不可為罷之  
誠宜若可為即俟時為之何必計校人言也政和二年  
十月都水監丞孟昌齡言開濬含暉門外白溝河開堰  
放水仍舊通流

### 溝洫

按汴京遺蹟志汴都地勢廣平賴溝洫以行水潦景德  
二年五月詔開京城濠以通舟楫毀官水磴三所三年  
分遣入內內侍八人督京城內外坊里開濬溝渠先是  
京都每歲春疏濬溝瀆而勢家豪族有不即施工者帝  
聞之遣使分視自是不復有稽遲者以至雨潦暴集無

所壅遏都人賴之大中祥符三年遣供備庫使謝德權  
治溝洫導太一宮積水抵陳留界入亳州渦河五年三  
月帝宣示宰臣曰京師所開溝洫雖屢鈐轄仍令內侍  
分察吏擾天聖元年八月東西八作司與內殿承制閤  
門祇候劉永崇等言內外八廂創置八字水口通流雨  
水入渠甚利慮所置處豪富及勢要阻抑乞下令巡察  
從之凡溝洫上廣一丈底廣八尺其深四尺地形高處  
或至五六尺以此為率二年七月內殿崇班閤門祇候  
張君平等言準勅按視開封府界至南京宿亳諸州溝  
河形勢疏決利害凡八事詔令頒行熙寧元年三月都

水監言畿內溝河至多而諸縣各役人夫開濶十繞二三須二三年方可畢工請令府界提點司選官與縣官同定緊慢工料據合差夫數以五分夫役十分工依年分開濶提點司通行點校從之二年開十一月詔以府界道路積水妨民輸納命都水監差官溝畎元豐五年詔開在京城濠澗五十步深一丈五尺地脉不及者至泉而止大觀元年七月以京城霖雨水浸居民道路不通遣官分督疏導是月又詔自京至八角鎮積水有妨行旅轉運司選官疏導修治橋梁毋使病涉

河南通志

張君平字士衡涇陽人以父承訓與契丹

戰沒補官遷右班殿直擢閤門祇候管勾汴口建言  
歲開汴口當擇其地則水湍駛而無留沙歲可省兵  
百餘萬從之天聖中君平以京師數罹水災請委官  
疏鑿近畿諸州古溝洫久之稍完遂詔畿內及近畿  
州縣長吏皆兼管勾溝洫河道君平有吏材尤明於  
水利自議塞河朝廷每訪以利害河平君平卒論者  
惜之

宋東京考卷之二十

嘉興石匏周 城緝

岡

奉聖岡

在城西南十里許以其地有奉聖寺故名金章宗時有二鳳凰率諸鳥飛集於此人遂稱為鳳

凰岡亦曰

鳳城岡

青龍岡

在城西南十五里一名杏花岡

牟駝岡

一作毛駝岡在城西北十五里天驕監牧養御馬駝騾之所後黃河衝激坍塌平夷矣

世史正綱

靖康元年春金將韓离不統鐵騎南馳攻

圍汴京屯兵於此

望牛岡

在城西南十三里汴城形勢如卧牛狀登是岡以望之則居然可見故名春月都人遊賞於此

牛尾岡

在封邱門外東一里許俗以汴城為卧牛城而此岡則牛之尾也

百岡

在城東北三十里有土堆百餘因名世傳宋文帝元嘉中檀道濟與北魏戰報盡而返魏軍棄之道

濟於暮夜唱籌量沙積至百堆以紿魏軍見之果退道濟全師而還

狼城岡

在城西三十里

侯家岡

在城南十八里

霍赤岡

在城東北二十里遼主耶律德光戒晉嘗屯兵於此

藥局岡

在城西二十里舊為朝元宮藥局

堠子岡

在城南六十里

井家岡

在城西南十五里

七里岡

在城西南七里故名

八角岡

在城西三十里

白墓子岡

在城南二十里

萬龍岡

在城東南五十里一名望龍岡

祝岡

在城東南五十里

蘇村岡

在城東南十里岡下有蘇氏聚族而居因名

獨樂岡

在城東十五里都人九日於此登高

汴京遺蹟志

相傳有一富翁居此男女婚嫁已畢不

問家事日邀故舊飲酒為樂徽宗微行見之羨曰斯

人其獨樂哉後因名其岡

毛岡

在城東南二十五里



鵝村岡

在城南五十里嘗命鵝

黑岡

在城西北二十五里其土黑色故名岡下有之多魚今謂又名泗魚岡

太平岡

在城東二十里

沙窩岡

在城東北二十五里

長腰岡

一名長葉岡在城東北二十五里

仙遊岡

一名牽牛岡在城東北二十五里昔有二老人牽二牛過此岡人異而問之忽不見故名

鏡家岡

在城東南五十里

赤倉岡

一名開顏岡在城東南四十五里

袁家岡

一名北梓岡在城東北二十五里

南村岡

在城東北二十里

縮頭岡 在城東二十五里

角橋岡 在城東北五里

邊村岡 在城東五里

殷家岡 在城東十里

白石岡 在城東二十五里上有石皆白色故名

胡岡 在城東二十五里

傅家岡 在城東二十里

楊子岡 在城東北二十里

槐苑岡 在城東北三十里

兔白岡 在城東北四十里

蘇家岡

在城西五里

獅子岡

在城西十五里

樊家岡

在城東

廟兒岡

在城南十八里

接沙岡

在城西北永安保西

奉神岡

在城南

以上諸岡累經黃河衝淤存者無幾而土人猶得指其遺跡焉

堆

青堆

有二一在武家營務保東

申家堆

在城西北永安保

大營堆

在城西南八角係東

王家塏

在城西南毛係東南

坡

幕天坡

在封邱門外李綱嘗敗金兵於此後為河水淤平

胭脂坡

在城西北東和保西朝幕斜暉照之宛若胭脂俗呼為紅沙岡

陂

夏候陂

在城西南十五里朱仙鎮保

好草陂

在城西南十五里朱仙鎮係岳武穆繫金人在此陂牧馬草生極茂故名

傳講雜記

都城西南十五里有地名麀糟陂土人惡

之自易其名曰好草陂

葦薺陂

在宋門外因水中多生葦薺故名收燈後都人採春於此

寒陂

在城西南開店保北

牧兒陂

在城西南開店保西

練子陂

一名留子陂一作劉子陂在封邱門外西南周太祖入汴與慕容彥超戰於此

青頭陂

在城西南開店保西

隄

滂隄

按一統志自城東至歸德三百餘里世傳漢梁孝王徙都睢陽時所築今俗訛為滂隄

金隄

按括地志一名千里隄漢順帝陽嘉中自汴河口以東緣積石為堰曰金隄

續文獻通考

按金隄古堰自開封府滎陽縣東經大

名府清豐南樂縣界山東郡至千乘海口千有餘里

歷代築以禦河患通謂之金隄嗚呼循金隄之遺跡  
稽黃河之故道合諸賢之卓見踵永賴之懋功推古  
驗今灼灼可行者但世習樂因循而憚改作此在今  
日勢尤難行後世哲人有作破拘攣之見或有取於  
吾言爾矣

隋隄

一名汴隄在汴河上按隋煬帝大業三年命尚書  
左丞皇甫誼復西通濟渠作石陡門引河水入汴  
汴水入泗以通於淮築隄樹柳御龍舟  
行幸以達於江都人稱其隄曰隋隄

山堂肆考

隋煬帝自板渚引河達於淮海謂之御河

河畔築街道樹以柳名曰隋隄計一千三百里

智囊補

熙寧中睢陽界中發汴隄淤田汴水暴至隄

防頗壞陷將毀人力不可制時都水丞侯叔獻涖役  
相視其上数十里有一古城急發汴隄注水入古城  
中下流遂涸使人急治隄陷次日古城中水盈汴流  
復行而隄陷已完矣徐塞古城所決内外之水平而  
不流瞬息可塞衆皆服其機敏

揚州鼓吹詞序 隋大業初開邗溝入江旁築御道樹  
以楊柳謂之隋隄隄今不復可考然記稱一千三百  
餘里則江河一帶皆其故跡矣但柳花飛落無復青  
青空有長條繫人亡國之恨耳

落蔡隄

在固子門外西北因  
其地生落蔡故名

接岡隄

在城西北永安保西接沙岡

護城隄

離城三里一名三里隄西北接金村遠城圍抱東南直抵蘇村蓋築以防水者後被河水衝圯

明正統間巡撫侍郎于謙因河水泛溢侵逼汴城虔誠致禱誓以身殉河遂消縮乃築東西西北三面以禦之範鐵犀勒銘其背以鎮永遠景泰二年巡撫都御史王選補築南面與東西相接凡四十餘里號大隄天順五年侍郎薛遠因河水入城乃於麗景門置石閘以洩內外積水

湧幢小品

黃河之隄莫壯於開封余考宋初黃河尚

在滑州相去三百里漸決遂直抵開封城下國初幾欲遷王府隄之所以益固也近日祖其說治運河有長隄遙隄縷隄等名其費不貲而衝決如故看來開封之隄紆曲堅壯制度絕佳其妙處全在紆曲因水



勢既猛隄若徑直全當其鋒勢必不支惟紆曲則若  
迎若避迎以抵之避以殺之今之橋堵亦用此法即  
宋藝祖剪紙圈築都城之意乃若運河之隄勢必不  
能紆曲又卑薄太甚如何禦水即堅壯亦止禦得散  
漫之水如何禦得衝決之水惟度其勢之所至預設  
埽以待可以徐徐幹轉

橫隄

在鄭門外南接大  
隄北抵接岡隄

婁隄

在城東婁隄保  
南北約十里餘

高門隄

在國子門外西北連落藜隄因  
在梁惠王古城高門之北故名

金村隄

在城西北西接高門隄  
因在金村之側故名

十八里隄

離城一十八里故名西北接封邱縣界東南抵密務保太平月築以防後被河水衝圯

夾隄

在固子門外築以夾護金水河西接中牟東抵外城後圯於河

汴護隄

在城西北岸

金水隄

在襄城外西至固子門東抵城濠

閘

小木閘

在襄城外東南

惠濟閘

在陳州門外

獨樂閘

在城南白堊子岡東

赤倉閘

在城東南赤倉保西

萬龍閘

在城東南赤倉保南

以上諸開俱為蔡河而設元末廢壞明洪武初重修二十四年黃河南徙蔡河及開皆為淤塞無存

洞

桃花洞

在揚州門內西北即上清宮道士所居之處環植以桃故名桃花洞

潭

蓮花潭

在城東十里

清水潭

在城西三里

龍潭

在城外四十里南北隄口有左右二潭歲旱禱雨輒應

赤倉潭

在城東南四十五里

以上洞潭諸蹟俱湮於河

渡

杏花營渡

在城西南十五里路通中牟縣

八角渡

在城西南三十里路通中牟縣

白墓子岡渡

在城東南十五里路通咸平縣

赤倉渡

在城東南三十里路通咸平縣

梁家淺渡

在城南十五里路通尉氏縣

以上五渡俱濟黃河以河徙而廢

陳家口渡

在城東南二十里路通尉氏縣

善善李渡

在城南二十五里路通尉氏縣

清水河渡

一名清河口渡在城南三十里

以上三渡俱濟黃河之支流以河徙而廢

泊

刺史泊

在城東南鄭店保南因唐刺史鄭公種葦於此故名

楊岡泊

在城東北霍赤岡保

楊六郎宅水泊

在裏城內西北本楊六郎宅外湖泊故名

龔家泊

冉家泊

牛家泊

俱在城西南八角保

以上諸泊俱湮於河

關

臨蔡關

在城東南赤倉保河顯德中浚開河入蔡河命水軍駕戰艦沿潁入淮以伐南唐置關於此金

季開廢土人仍  
呼其地為關頭

通津關

在城東北馬尾墻保埽頭河周顯德四年疏汴  
水入五大河以通齊魯舟楫於此設關元時河

漲淤  
塞

橋梁

天漢橋

唐名州橋在府治東南一里許正對大內御街  
與相國寺橋皆低平不還舟楫惟河水平舟可

過並以青石為之石梁石笋橋欄及近橋兩岸皆石  
辟雕鐫海馬水獸飛雲之狀橋下密排石柱蓋車駕  
御路也

癸辛雜識

汴京天漢橋上有奇石一大片有自然華

裔圖山青水綠河黃路白粲然如畫真異物也後聞

移置文廟中作拜石

沒儀橋在府治西南

興國寺橋一名馬軍衙橋在府治西南

相國寺橋在府治東南

龍津橋在府治東南蔡河上又名新橋

觀橋在五嶽觀後故名

宣泰橋

橫橋子

高橋

西保康門橋

太平橋

糴麥橋

第一座橋

宜男橋

已上八橋俱在陳州門裏蔡河上

四里橋

在戴樓門外

虹橋

在東水門外七里其橋無柱皆以巨木虛架飾以丹雘宛如飛虹其上下土橋亦如之

上土橋

下土橋

順成倉橋

便橋

以上四橋俱在東水門內外

太師府橋

在府治西南丞相蔡京宅前因名



金梁橋

在東水門裏

雷家橋

在府治南蔡河上龍津橋西

小橋

在南薰門內蔡河上

宣化橋

在府治前

西浮橋

在宜秋門外舊以船為之後用木石改造

小橫橋

廣備橋

藥市橋

青暉橋

染院橋

朱雀橋

白虎橋

五王宮橋

以上諸橋俱在正秋門外

念佛橋

在曹門內內諸司軍營皆在曹門侵晨上直有替者在橋上念經求化故名

板橋

在新鄭門外種師道敗金人於此

洗馬橋

在新鄭門外

得勝橋

在城內

雲驥橋

在麗景門外遙南

白鵲橋

在園子門裏

駱駝橋

在鄭門外

以上諸橋皆在京城內

陳橋

在城東北四十里即藝祖為眾擁立處也

玉照新志

陳橋在京師陳橋封邱二門之間藝祖啟

運立極之地也始藝祖推戴之初陳橋守門者拒而

不納遂如封邱門抱關吏望風啟鑰逮即帝位斬封

邱而官陳橋者以旌其忠於所事焉

井

花園井

在府治西南朝元萬壽宮相傳謂楚項羽御花園井

閤門井

在文德殿左掖東上閤門之東其水絕佳山谷憶東坡烹茶詩云閤門井不落第二竟陵谷簾

空誤書

相國寺井有二在聖容殿前東西木工喻浩建有井亭極其精巧為相同寺十絕之一

海眼井在安遠門裏上方寺內相傳泉源通海故名元末寺毀於兵而井失其跡

八角井在城西南水苦不可飲劉敞詩有誰鑿八角井不方亦不圓此地饒美水此井獨苦泉泉甘常

不竭泉苦更永年之句

三眼井在安業坊井口一石而三眼故名

義井在東水門裏金梁橋南相傳元時邑民劉道源因往來人衆造亭於上設汲水之具遇盛暑則汲以

濟人故名

汴京遺蹟志 國朝洪武中即宋故宮遺址建周王府

乃太祖第五皇子諡定始分封之國城中井水悉苦

鹹難飲惟周府太廟前井水甘蓋宋大內舊井也

陵墓

倉頡墓

在城東北二十里時和保俗呼為倉王家旁

倉王城世傳倉頡所築按禪通紀倉頡居陽武而葬利鄉路史云今開封之祥符故浚儀縣即春秋之陽武高陽鄉也或曰利鄉疑即時和保之墟也

真珠船

述異記倉頡墓在北海俗呼為藏書臺一統

志倉頡墓在陝西白水縣又大名府南樂縣河南祥

符縣山東壽光縣並有倉頡墓白水即古之衛壽光

即北海地然未詳孰是也

按方輿勝覽倉頡冢亦載有數處又皇覽冢墓記倉

頡冢在馮翊衙縣利陽亦南道傍高六

丈學書者皆往上姓名投刺祀之不絕

梁王墓

在城西八角保高三大廣百餘步無碑文可考世稱魏陵鄉地名梁固疑即魏侯榮之墓也

段干木墓

在城西北二十里

信陵君墓

在城東南揚州門之南  
魏公子無忌卒葬此

朱亥墓

在城西南俗呼為屠兒原蘇軾詩有昔日朱公子雄豪不可追今來遊故國大家屈稱兒之句

塵史 朱亥墓在都城南過所謂四里橋之道左旁有

祠垣宇甚全木亦茂呼為屠兒墓園清明則衆屠具

酒肴祀之出於人情也

老學菴筆記 王荊公素不樂滕元發鄭毅夫目為滕

屠鄭酤然二公天資豪邁殊不病其言毅夫為內相

一日送客出郊過朱亥冢俗謂之屠兒原者作詩云

高論唐虞儒者事賣交負國豈勝言憑君莫笑金椎

陋却是屠酤解報恩

尚友錄 朱少大梁人勇俠隱於屠肆侯嬴薦之魏公  
子無忌使奉辭謝秦秦王怒使置之虎園亥髮上衝  
冠瞑目視虎虎不敢動遂以禮遣復使亥袖四十觔  
鐵椎擊殺晉鄙奪其兵符退秦存趙

扁鵲墓

在閭閻門外西北菩提寺東原在子城內唐元和十五年宣武軍節度使張弘靖從葬於此相

傳四傍土可以為藥禱而求之或得丸如丹劑

張儀墓

在城東北七里儀魏人也為秦相卒葬此

趙王墓

在城東北母寺保漢趙王張耳墓也

昭靈陵

在城東北四十五里馬尾塢保漢高祖母昭靈后陵也其地即春秋宋之黃鄉陵寢累經黃河

陳留風俗傳 小黃縣者宋地陽武之東黃鄉也因黃

水以名縣沛公起兵野戰喪皇妣於黃鄉天下平定

乃使使者以梓宮招魂幽野於是丹蛇在水自洒

濯入於梓宮

水經注丹蛇作丹旒云於是丹旒自水濯洗入於梓宮

其浴處有

遺髮

一作髻

馬故諡曰昭靈夫人因作寢以寧神也

東觀漢記

虞延字君大陳留人為都督郵世祖東巡

路過小黃高帝母昭靈后園陵在焉詔呼引見問園

陵之事延進止從容跪拜可觀其陵樹株柏皆諸其

數俎豆犧牲頗曉其禮帝善之

蔡邕墓

在城東北四十里



罪卓墓

在府治北劉敞詩有蓬蒿道旁冢云是晉時賢名聲與陵谷共盡亦千年之句

李衛公墓

在城西南開店保塘李靖葬此墓旁有祠

段志賢墓

在城西南開店保之王家莊

單雄信墓

在望春門內西北隅旁有軍將軍廟明初為左護衛軍營

陶穀墓

在東水門外

畫墁錄

東水門外覺照院元祐末予緣幹適彼與寺

僧縱步道旁指一壙云此陶穀墳也墓門洞開其間

空無一物因諷寺僧為之掩覆僧曰屢掩屢開不可

曉十餘年前有陶姓人作寒食爾後不復來陶為人

輕檢嘗自言頭骨當珥貂蟬今則髑髏亦不復見矣

紺珠閒錄 陶穀性險惡好陷害人初自單州判官為  
晉相李崧收用遂得入閣及崧歸漢徐逢吉有意害  
之穀乃迎意構成崧事遂致赤族之禍後穀死葬於  
覺照院墓門屢掩屢開院僧復為築塞忽雷雨大作  
墓門洞開無一物矣

堯山堂偶雋 太祖之受周禪也百官班定猶未有禪  
詔翰林承旨陶穀出諸袖中遂用之穀意希大用及  
范質拜相穀草制詞曰十年居調燮之司一旦得變  
通之術質泣訴於太祖由是薄其為人終身不獲大  
用

李駙馬墓

在城東北二十里南神岡尚太宗女荆國大長公主左龍武軍駙馬都尉累遷鎮國軍節

度使知許州贈中書令  
諡和文李遵勗墓此

石林燕語

祖宗時駙馬都尉宅主薨例皆復納入墓

或別賜第曹沂王宅許懷德舊第也李和文宅亦王

貽永舊第自和文始世有之宏麗甲諸主第園池尤

勝號東莊和文好賢樂士以楊文公為師友其子孫

多守家法一時名公卿率從之遊宣和間復取以為

擷芳園後改寧德宮以居寧德皇后云

國老談苑

李遵勗為駙馬都尉折節待士宗楊億為

文於第中築室塑像晨夕伸函丈之禮刻石為記

一幾億卒

李留後墓

李留後名端懿駐馬遼陽子也官至寧遠軍節度觀察留後封至於父遼陽墓側

宋稗類鈔

李端懿問卜人李易簡曰富貴吾不憂但

問壽幾何易簡曰君大長公主之子生而富貴窮奢極欲又求長壽當如貧者何造物如此無乃太不均乎遂不與卜

王旦墓

在城東大邊村旦本大名莘縣人父祐知開封府因家焉卒葬此

容齋隨筆

祥符以後凡天書禮文宮觀祭祀巡幸祥

瑞頌聲之事王文正公旦實為參政宰相無一不預公知得罪於清議而固戀患失不能決去及臨終乃

欲削髮僧服以殮何所補哉魏野贈詩云西祀東歸俱已了好來相伴赤松遊可謂君子愛人以德矣歐陽文忠公作公神道碑悉隱而不書蓋不可書也公持身公清無一可議然獨有此者功名之際人所難耳

劇談錄

魏野咸平景德間隱士和易通俗人樂從之

遊王魏公當國尤愛之亦數相聞天禧末魏公屢求退不許野寄以詩曰太平宰相年年出君在中書十  
五秋西祀東封俱已了好來相伴赤松遊魏公亟袖以聞遂得謝

資治通鑑 旦臨終遺令削髮披緇以殮蓋悔其不諫

天書之失也諸子欲奉遺令楊億以為不可乃止

廉吏傳 旦疾甚遺戒子弟我家盛名清德當務儉素

保守門風勿為厚塋以金寶置櫃中帝親視疾賜白

金五千兩旦作奏謝之藁末復益四句云益懼多藏

况無所用見欲散施以息殃咎即昇至內閣詔不許

湧幢小品 無垢居士言讀書攷古人行事既已信其

大節若小疵當缺而勿論蓋其間往往有曲折人不

能盡知者如歐陽文忠公誌王文正公墓言寇準從

公求使相寇公正直聞天下豈向人求官者若此類

宜慎言之余謂世間如此類甚多若宋子京為晏臨菑門下士晏公罷相制有廣營產以殖貨多役兵而射利等語亦未必遂真也

丹陽伯墓

在城西南八角保大營舖南丹陽伯葛景先墓此

呼延贊墓

在城西南朱仙鎮東北原上咸平三年贊掌護元德皇后園陵儀衛還卒墓此

尚友錄

呼延贊太原縣人累功績官至康州團練使

有膽勇徧文其體為赤心殺賊字至於妻孥僕使皆然諸子耳後別刺字曰出門忘家為國臨陣忘死為主

周令公墓

在城西南開店保

永泰縣三墓

在城西南開店保

祥符縣志 永泰縣主宋太祖從孫女性慧孝動循女

誠年十四歸右班殿直梁子才克執婦道事舅姑孝謹夫亡時年二十二哀毀幾殞諸族欲奪志永泰以節自誓終身不渝初封共康郡君元豐中加今封以褒榮之

向太夫人墓

在城東北二十里向文簡公敏中祖母葬此

宋稗類鈔 向文簡公父欲葬其母時開封府城外有

地識曰綿綿之岡勢如奔羊稍前其穴后妃之祥術者以穴在一小民菜園中恐民不肯與因夜葬其地



民以向橫訴於府尹尹令重與之價仍不廢其菜次  
年遂生文簡公欽聖后文簡孫也

曹仙姑墓

在城西南關店保按仙姑諱道冲字冲之其先寧晉人襄悼鄆國公利用之族孫也父宗

詰欽州靈山縣主簿母石氏五代晉之後初鄆國公章聖時和我有勲賜第都城因居汴仙姑自扶坐能言便解文字五歲賦詩屬文十五歲古今載籍所記極博家人患其弄翰墨即登屋賦詠書遍萬瓦洞徹諸教皆得其要妙嘗謂處世居家均在樊籠不願嫁適脫身遷去二十一歲隱於少室山玉華峯極神導氣者十餘年家人踪跡之則宛轉潛避齊人張公諫議知其異度為女冠因遙指青州遠遊觀張幾真為師既而受籙於閭皂山晚入京師衣足蔽體食僅充腹廕容膝之地混然與貓犬同跡都人供饋者肩踵相摩多所不納有不能却尋以施予不茹葷血但日市以食貓犬或詰其故曰無他救其欲殺者而已以謗其肉食者即取以對食曰於道何害但不欲耳微宗召對無時給金牌二聰起行在與諸池苑無得宗

止延見異數莫與倫比詔加清虛文逸大師初名希  
蘊至是始賜今名又加道真仁靖先生並為起第乃  
瀝懇求辭不得已僅受數楹以奉三清晨夕焚修用  
祝君壽詔名其室為寶籙堂又為營保慶泰寧宮於  
其側將落成而尸解上為之  
惻然贈號希元觀妙先生

閒雲老人閑